

《日子》台語曆日仔詩

自選詩作 5 首/陳胤

January-1

<大海>

挽一粒天星，送予你
稀微 ê 暗暝，心
就曠闊，袂躊躇礙虐

&

挽：bán，摘取。

躊躇：tiù-tù，猶疑。

礙虐：ngāi-giòh，尷尬。

January-2

<曠闊>

是我 ê 心，抑是你 ê 情
天 ê 胸坎仔，歲月懵懂
不時，和咱走相逐

&

懵懂：bóng-tóng，無知不明事理。

相逐：sio-jiok，互相追逐。

January-3

<歲月>

年年好年，日日好日
過往 ê 家己，就留佇過往
每一巡皺痕，若花拄開

&

佇：tī，在。

巡：sûn，道，量詞。

皺痕：jiâu-hûn，皺紋。

拄：tú，剛剛。

January-4

<皺痕>

輕輕仔問你，用詩
花 ê 目屎，有佻濟情意
溪河掣流，時間 ê 心事

&

皺痕：jiāu-hûn，皺紋。

佻濟：luā-tsē，多少。

掣流：tshuah-láu，急流。

January-5

<溪河>

一幕一幕，人生光景
慢慢飛入去你目睷
風吹開，我 ê 懷疑

&

懷疑：giâu-gî，懷疑。